

أشعار بالعامية

شجرة أهل

شعبان التونسي

دار الكتب والوثائق القومية

بطاقة مصره

مصره أثناء النشر

إحداث الصيغه العامه

لدار الكتب والوثائق القوميه

إدارة الشؤون النهيه

القونى/ شعبان

شجرة أمل/ شعر عاميه/ شعبان القونى

ط / المنصوره : دار الإسلام للطباعة والنشر. ٦..٣

ص. ٣٣. سم.

٢٠٠٧/٤٧٩٧

ترقيده دولى/ ٢٧٨٤-٣٧٤-٩٧٧

الشعر الشعبى أ - العنوان

٨١١/٩

قراءه أدبيه

فى ديوان (شجرة أمل)

ما بين الفطره والموهبه ومفردات الحياه
الصعبه والمخيفه يغرس الشاعر شعبان
التونى شجرة أمل لتخضر الحياه وتكسوا
الانسان بثوب مطرز بأوراق الامان
والاطمئنان لذلك فإنه أبدع وأرتقى بحسه
المبدع الى قمة الصفاء والنقاء وأبتعد بنا
كثيراً عن جنادل الجحود وشلالات الجفاء
وغاص بنا فى بحور عذبه وشفافه وأخذنا
الى شطوط الاحلام المستباحه فى أول رحله
له مع الشعر وقد قطف من ثمار فطرته
وموهبته رغم الظروف الصعبه التى ربما
تعيق من لا يقوى على تحمل مشاق السفر
وتضاريس الرحله وإذا كان شاعرنا قد جعل
من قصائده أزهاراً تتمايل فى نسيم الحياه
فإن ذلك ينم عن قلب نابض وروح فضفاضه
وأفكاراً مستنيره ورؤيه واقعيه لكل ما يدور
حوله وكل ما يجول بخاطره متخطياً
إعاقته ومعوقاته فإنه يكتب بأحاسيسه

ويسطر بمشاعره ويرى بعين العقل والمنطق
أنه لابد أن يمضى قدماً فى معترك الثقافه
والابداع إيماناً منه بأن الأمل مفتاح الحلم
والصبر والرضا زاداً وذواداً للنجاح لذلك
خلق شعبان التونى فى سماء الشعر ,
بإخلاصه , وتفانيه فى إظهار موهبته ,
ودماسة خلقه التى جعلت منه مبدعاً واثقاً
فى موهبته و متمسكاً بفطرتـه متفرداً فى
مفرداته فى هذا الاصدار الاول (شجرة أمل)
والذى اثمر عن إحدى وعشرون قصيده
يبدأ بقصيدة (شجرة أمل)

وينتهى بقصيدة .همس العيون .

وما بين السبدايه والنهايه ,

أفراحاً وأتراحاً , وأوتاراً تعزف , ورياحاً
تهب وعواطف تسرى فى الوجدان
ومواجهات مؤلمه , وأمنيات حالمة وأحكاماً
تحتاج الى العون فى تغيير واقعنا المؤلم من
شدوذ ونفور وعلى هذا النحو يدور شعبان
التونى فى دوامات السنين الغابره والحاضره
حتى إنتهى الى إخراج ما فى جعبته فى هذا

الديوان الاول له والذي لن يكون الاخير
ان شاء الله, ولذلك فإننى أدعوا الله العلى
القدير
أن يوفقه و يسدد خطاه الى ما فيه الصلاح
والفلاح والرشاد
والله ولى التوفيق

م / عادل محمد عامر

إهداء

إلي أهلي وعشيرتي

إلى رفيقة حياتي

إلي أبنائي

ايمن * ايمان * امال * اسماء

إلى كل

قرائي الأعزاء

اهديكم ديواني الاول

(شجره أمل)

راجياً من الله العليّ القدير ان ينال

رضاكم

والله الموفق

شعبان ابراهيم التونسي

شجرة أمل

يا امه انا عربى
كل الوطن وطنى
تار العرب تارى
دم الشهيد دمس
فرح الشعوب فرحى
هم البلاد همى
يا امه ما تهمنى
لمى البكا والويل
وارسى على المينا
يا دمعه فارقينا
الامه دايمه حزينه
والدنيا مايلا بها
والشر حوالىها

والغدر في دروبها
وركبها اهل الضلال
وبيمشوفى دروبها
تا هت مراكبها
غرق ت مراكبنا
والبحر هايچ عليكي
والمد ساييل علينا
ويوماتى بتعذينا
وبتفتحي فينا
الفين طريق للهلاك
وشرينا الاستغلال
والكل ف استهلاك
والدنيا داقت علينا
الظلم ماسك أيدينا
وبيطفى فينا النور
والشرك ديب سهران
دايرف كل مكان
بيهد فينا العزيمة
ويجور على الاسلام

حتى نبينا المكمل
ما سلمش م الطغيان
والشر رافع ايديه
والظلم متحكم
ويوماتي يحكم علينا
بالقتل والتشريد
وكلايه ع المسطبه
قاعدين بياكلونا
شوكة وسكينه
والجته متعلقه
خنازير بتمزمز
جنازير بتهزهز
والغدر متحفز
والغالي ضاع منا
وتمللي بينا خصام
وحروب دواره
غاراه ورا غاره
بتتهد وحدتنا
وعدونا فرحان

وبينتنظر موتنا
وتمللي حاقدا علينا
والمكر من طبعه
إحنا بنزرع سلام
وهو بيقلع
والحلم فينا إتخفق
والياس بيفرع
والحيره لعبت بنا
واساسنا بيصدع
يامفرقين شملنا
خلو الونام يرجع
يرفع رايات الجهاد
رمل البلاد يفزع
نسكن في حضن الهنا
والشمس تملانا
ترمي الوهن والكسل
ونعود لامجادنا
ياأمه شقى التاريخ
نادى على جدودنا

بجنودنا يرجع وجودنا
للقـتال والـكر
ندخل حروب الكرامه
ونلاقى لينا.. بر
نرسى على نصرنا
وتضـمنا الافراح
ترتاح عيون السما
والدمع ينسى العين
وتعود سنين البطوله
نرفع جيبنا لفوق
نلقى الحقـوق
الى راحت
م العنا إرتاحت
نامت على صدرنا
والحـضن هدهـها
والارض تحضن وليدها
وولدها يفـديـها
وبدمه يرويهـها
لجل الكرامه تعود

صيد

انا صياد
وفن الصيد موالى
ولما الرزق نادالى
صاحبت البحر وعشقتة
لقيته كون ما لوش آخر
وعالم تانى خلا نى
نسيت عالم ماحبتهوش
انا والموج بنتسابق
ما بين نوه وريح على
حضنت الصيد بموالى
وكان البحر رسمالى

وقولت كـلام
مع الاسماك وفهمتني
ما انا إتعلمت م الاسماك
حواديتها ولغوتها
وبلطيه بخفتها
لقيتها برقه طالعه لى
أميره ومهرها غالى
بيا ضه صاينه عزتها
تملى تبص فى العالى
شبكت فى شبكى
وغمزت لى فى صنارى
طرفنى شال الهوا
وبتوبه غطانى
وصانى قاضى الغرام
ع البحر والميه
والبحر بيبص لى
وانا مركبى جأيه
والصيره بتهزنى
وتبص حوالىها

الرعب في قلبها
والحزن في عينيها
سألت إيه السبب
في الحزن يا جميله
يا صغيره في الهوا
وكبيره في العيله
جوه القنال العفى
متحصنه م الريح
لا هزها قنبيله
ولا همها صواريخ
وعيد ميلادها الليله دى
وهانصب التفاريح
للدنيا بعنت إشاره
والكلام بصحيح
طلبت حمايه عيلتها
والشبك مطروح
روح.. القباييل
بيتمايل على المراجيح
ومراكب الصيد

بتدارى من الاهوال
والاحتلال الغلبى
بيجرف الكنسه
ويوقف المكنه
وبيعدم الاجيال
ويهذ فرحتهم
يقطع سلا لتهم
ويبعتر..الكنسه
والبيض فى عنقوده
بيحيض ويبمشش
زريعه بتعشش
فى بحور ضمايرنا
ومصيرنا مش مسئول
عن اى غول مهبول
بيقسم الشروه
ويرقد الفتنه
والبينه عايمه
على شاشة الميه
وجوه بطن الشبك

الكنسه محصوره
بينها وبين القمر
صوره وفزوره
ع الى بيا كلونا
والى بيشوونا
لاكن ما فيش صيره
تدينا لحتتها
من قبل ما تبلع
غصتها بتفرع
تقلع شجرتها
ليه يا قمر غفلان
والضى فيك إتوند
رزق إتولد للبلا
والذكر فى القرآن
نعمه من الرحمن
اللحم حلو وطرى
بالعمله نستورده
بالمال والاستغلال
يا عم يا مغنواى

غنى كمان موال
صياد باحب الجمال
وبادوب فى كل عفيف
لاكنى باكره
تجريف البحر
فى الضلمه

عضة التعبان

قلب الحياه اشتكى
حتى الزمان غضبان
من فتنه بتهدكم
من لدغة التعبان
انيابه ..متسلطه
طمعان في كل مكان
بيمص في دمكم
عشان لا قيكو نيام
عايزين صلاح الدين
يرجع على الرهوان
يمسح دموع عجزكم
يفتح لكو الاوطان

القدس اصبح حزين
وكل يوم في مرار
بغداد في عز النهار
بتعاني من الغليان
والظلم عم وذاد
والهم كاس الولاد
نسا وشيوخ ورجال
حتى الطفولة البرينه
مش لاقية حضن امان
والشمس ملّت سماتا
مكسوفه م الاحوال
حتى النهار إنطفئ
م الكرب والاهوال
عروسه يوم الزفاف
بالتاج وبالفستان
وعريسها كان جنبها
فات الحياه بنيشان
والزرع شاب في الغيطان
واصفرت الاشجار

حتى الربيع اختفى
صبح الخريف طرزان
غابت شمس الوطن
والضى بات زعلان
زادت مرارة قلوبنا
والجسم بات تعبنا
إمتى الكيان ينتشى
امتى المكان يصفى
م المر والحر نطلع
والوجود يرتاح
نقلع جذور الطمع
ونسد باب الشر
ونغطي ع المر
بالوحده والاخلاص
ياللى الوجع بحركم
ما تنادو مره خلاص
حنعلى بينا الاساس
ونوحد الكلمه
وتعدى بحر العداوه

ونقرب المسافات
ونخلي كل الرايات
تعلو لفوق ونروق
ساعة ضياع الحقوق
نصرخ بالف لسان

ليه يا قلبي

بعد ما حببت يا قلبي
ليه تداري وليه تخبي
كل شي مكشوف يا قلبي
والهوا مش مستخبي
ليه تخوني وليه تهيني
مش هترجع حته مني
لما دوقت الحب مره
ليه بتهرب تاني مني
هوذي نبي ان انت قلبي
كل ساعه تهد حبي
مش كفايه عذاب وحيره

لما بحر الشوق لعبى
انت قلبى ومش مسامحك
ياللى علم فى جرحك
بعتنى وهدمت فرحك
كل يوم القاك تا عني
ليه بقيت قاسى على
بعد ما حببت يا قلبى

شَرَّفْتَ يَا رَمَضَانَ

يا هلال طلع في السما
خلَّى النجوم ما تنام
والبدر لما اكتمل
صوت المأذن هام
والكل ليك مشتاق
وبيحسب الايام
رمضان يا شهر الصيام
والزكر والقرآن
النخل شاف القمر
نزل الرطب فرحان
والمسلمين يفطرو
على سنه العذنان
نور الحبيب النبي
ضَوَّى في كل مكان
عشقه قلوب مسلمه

والبركه فى رمضان
والزراع خضر وبشر
أما اليتيم فرحان
يا شهر فيه الزكاه
فريضه م الرحمن
بالرحمه والمغفره
والعتق م النيران
يا شهر كلك أمان
وبتنصف الغلبان
بعد الصيام والقيام
والزكر والتسبيح
وأيام تمر ف ساعات
وساعات تمر ف ثوانى
وإحنا بنزرع أمانى
ونقول ياريتّه يدوم
رمضان يا شهر الصوم
خليك شويه كمان

إخوات

قدرنا نزرع أمل
في جنتك يا قلوبنا
والورد أخضر يلاغي
عشقك يا شمس بلادنا
صورتك في حضن القمر
طرحت ف كل جبين
الدين يفيض ف قلوب
إخوات ومتعهدين
والامه وفيها إتحادها

هلال وجنبه صليب
الاتحاد ضمهم
والرمز هوا الدين
عاشق طريق حبهم
وشمس مش بتغيب
إتحدو فى أرضهم
وريج هواهم طيب
طرحت زهورهم محبه
فى قلب كل حبيب
مهما تشيب السنين
والجيل وراه الجيل
الشمس بتلهمهم
والوحده ما لها بديل
إخوات والام مصريه
فى وحدة حب آلاهيہ
والام أخت عربيہ
ما تجنى نبع كراهيہ
ورحمه
بتسرى فى قلوبهم

وجت فتنه تفرقهم
فتنه زرعها الشوك
سكينه ف طريقهم
عليت جسور الظلم
بالغدر وانقامت
دبلت زهور الحلم
وبفرعها مالت
م الحقد شاب فرحها
وبحزنها باتت
معدوره من وردها
وبزرعها ماتت
قام الهلال والصليب
قالو الصعاب تنصاب
والود يبقى الطريق
نرجع سوا احباب
بسمه عينيها إتكلمت
من قلب عين الصعيد
ويطوف خيال الهوا
جوه التاريخ ويعيد

عليت قلوع الوداد
والايد تشد الايد
نمسح دموع القلوب
ونمد حبل الوريد
والنيل يداوى العطش
والفجر يولد آمال
صوت الهلال والصليب
بيحرك الاجيال
والصحرا بالفرحه
لابسه الخضار فستان
منقوش بورق الشجر
على كل توب بستان
يضحك في وش القمر
وجنة الايمان

جنة الحب

سألوني ع الحب مرة
قلت أحواله كثير
مرة يبقى شهد خالص
والقلوب حوالية تطير
مرة يبقى مر حنضل
من مراره نستجير
والقساوه تملا روحنا
والجفا يفتح جروحنا
من الآمنا ننسى روحنا
تنسى أفراحنا الليالي
والهوى لو كان مثالي
والغرام لو كان ملالي
والحنان يطرح زهوره

لما تملأنا الأمانى
الوفا للحب ميه
والصفا للحب ذاد
والهنا لو مره رفره
طيره هيلف البلاد
والقواد يرتاح ويهدا
م المناهده والمعانده
لو ناوينا نشيل دا من دا
بدرنا فى الكون يلالى
لو يدور الحب غاوى
فى القلوب يسهر يداوى
كل شئ يصبح مساوى
والغناوى تشوف هانا
ليه تعانى ليه تقاسى
والمقاسى ليه تذيد نا
الهوا دايمنا واخذنا
وف بحور الشوق رامينا
جوه قلبى الحب خضر
والامانى يوماتى تكبر

والامان لو ضاع ما بينا
والعتاب توّه دلينا
الشموس هتغيب وتبعد
والقمر مش هيصاحبنا
جنتك يا حب ةاحه
بالمهاوده والصراحه
والكاسات الحلوه منك
تروى قلب الدنيا راحه
والحبيب لو صان حبيبه
مستحيل فى يوم يسيبه
فى الفرّح هايقيد شموعه
فى الجراحه هيكون طيبه
والسؤال لساه طويل
واحنا قولنا يا دوب قليل
والسبيل للحب بينا
أننا نفتح بيّباتنا
وان سألنا واتسألنا
ردنا يصبح جميل

أغلى حب

يا حبيبتي... يادلىلى
يا قمر سهران فى لىلى
يا شمس عمرى وحياتى
مدى إيدك و إفتحلى لى
يأمل جواي عايش
هاتى شوقك قربي لى
عاشق الضحكه ف شفايفك
عاشق البسمه فى عينيكي
نظره منك تملا عيني
ريحيني يا أغلى حب

كلّمه منك كلّميني
خلى نار الشوق تشب
لما شوقى فات قبالك
الغرام شاغل عينيكي
لما لمس الحب سألك
شفتي بختك بين إيديكي
كنتي ماشيه جنب مني
بس كنتي جوه مني
والتقى ضيك يلالى
والتقى سحرك يغنى
والحنين خدني ورماني
جوه قلبك جوه روحك
وأما شوفت
شروق صباحك
الغرام ميل عليكي

بحر الشوق

قـولـت كـثـيـر إـن أنا باهـواك
يا ما أـخـدنى الحـب ورا ك
قـلـبـى وروـحـى
وفـرحـى ونـوـحـى
داقـو المـر ياروـحـى معاك
طـول العـمر هـواك قـدامـى
وبـيـسـرح حـتى ف احـلامـى
ولـيـلاتى بالـقـاك فى مـنامـى
يـتـزـورنى والقـصد نـبـيل
تـعـمـل لـيـه انـك مـش سـامـع
يـعـنى عـشان انا رزقـى قـلـيل
هـوـه نـصـيـبـى ف الهـوا ضـايـع
لـاكن مـنى الشـوق قـنـديـل

جوه بحور العشق عليل
ذى القشه وموجى غالبنى
وسفينتى مش لاقيه دليل
مره تاخذنى ومره تجيبنى
وسفينتى دايمًا تتعبنى
كل ما اشوف الشط بعينى
لقى رياح الآه تبعدنى
قلبى انكوى فى الهوا من تانى
وتعبتيني والصبر ملانى
ورميتنى فى الويل ونسيتنى
وما عنيتش عارف عنوانى
سيبينى لوحدى اعيش ايامى
لملم شوقك وانسى غرامى
خايف منك على احلامى
خايف دمعى يملا البيت
سيب حواديت الحب وبيعها
قبل عزولك ما يقطعها
ودفاتر عندك وزعها
على احساسك لو حسيت

فتفت الخاطر والبال
ومليت الاحوال أهوال
إيه ذنبي فهمنى إمال
من كتر آلامك ملئت
أنا قلبي رهيف ورقيق
وبيفتح للحب طريق
وأنت فى بحر الوهم غريق
وبتنسى اللى بيهواك

سهر الليالى

ليه يا حبيبتي بسرعه نسييتي
ورميتي الاحلام وقسييتي
مش فاكره ان انا حبيتك
وتمللي بـولع قنديلك
حبيتك قد سنين عمرى
وحنينى ليلاتى يعدى لك
ليه قلبك دايمًا يظلمنى
من همس الحب بيحرمنى
با اكتب لك وابعت لك ودى
وأندده لك حتى ما بـتردى
لو تيجى القلب هيفتح لك

والحُضن ها يفضّل مفتوّح لك
لو ساعنى وجودك من تانى
وقمرنا ينور فى سمانا
والقياكى جنة احلامى
تبقى لى بهجة أيامى
وأزرع لك فى ضلوعى جنينه
وأفرش لك أرضك بالحنه
ونروق دمنا ونسير
ونزقزق زى العصافير
وجريتى ورا وهم كبير
وغرامى جواكى اسير
وهواى بيعمل لك خاطر
وباشيلىك من اى مخاطر
وجمالك دايمًا يأمرنى
والشوق علشانك سهرنى
والدق يعدى ولا يسلم
ودموعى ع الخد تعلم
وانتى فى هجرانك غرقانه
وتمللى عيونك قلقانه

والروح جوائ بتفتح لك
والدنيا هترقص فرحانه
هيغنى الهوا على الحانى
وزهورك تعشق اغصانى
تلاقينى جنة احلامك
وابقى لك بستان ايامك
وابنى لك ع النبض مدينه
واملنا يخضر حواليا
ونسابق بهوانا الطير
وعشوش الحب هتاوينا

إحنا ولادك

مهما كبرنا .. ومهما علينا
احنا رجالك احنا ولادك
وانتى النسمه اللى بتحيينا
وانتى الذاد اللى مشبعنا
وانتى الميه اللى بتروينا
وانتى الحضن اللى بياوينا
لمّا الدنيا علينا تدور
وانتى الفرحة وانتى النور
ماشيين فى طريقك يابلدنا
وشبابنا مستنى الدور
وبنسبح فى نعيم أمجادك
ورحابك دايمًا بيساعنا
والبسمه فرشنا وغطانا
علشانك نزرع ونخضر

عشانك نصنع ونعمر
وعشانك يا حبيبتي حاربنا
وف عز الشده اتشمرنا
وعبرنا والمولى معانا
ومسحنا العتمه بقوتنا
لا حصون الكافر منعتنا
ولا حتى جسور العدو ان
وبكل جساره إتحدىنا
وملينا الدنيا بنصرتنا
والعالم سامع كلمتنا
وجنود الله بتعدينا
والغدر بيسقط فى أيدينا
وسلاح الحريه اتكلم
واتحرك شعب اسماعيليه
م التل لفأيد لفناره
وكسفرت إخلاص وشطاره
والقنطره من غاره لغاره
بتكافح وبتحمى الارض
والارض بتطرح فدانىيه

والشهداء راحو الوفات
أبطال وبتهوى الحريه
وما فيش واحد منهم مات
أحياء والجنه بتأويهم
أساميهـم بترفرق بينا
ودفنا تماشيح الغرب
وف عز الضرب ما خوفناش
والثغره فى الدفرسوار
كانت مقلب م الاشرار
علشان نرجع تانى نعيش
جوه اليأس ووسط العار
لاكن محينها بأسـتيكه
وأسرنا ياـجورى الجزار
وشارون المجنون كيدناه
والكـيده من عند الله
حاصرونا وحصارهم زال
ونجحنا وإرتاح البال
واثبتنا على خط النار
نادو بوقف النار فـكرنا

وقرارنا كان كله سلام
والمغرور أصبح مكسور
والمهزوم أصبح منصور
والنصره من عند الله
الله على نصرك يا بلدنا
خلى الباغي يقول الآه
فدائيه وحب وتضحيه
وعزيمه وأراده قويه
والبشريه بتحلف إنك
مصريه وشموسك طارحه
وترابك معدن م الغالى
وشبابك عايق طوالى
والحنه فى ايديك والفرحه
ع الجبهه مداين مشهوره
والصوره كلها وطنيه
وإسماعيليه جميله جميله
وقنالك م القدره هديه
وسفاين ع الميه تسافر
وبواخر بتعدى عليه

من مينا لمينا تحيينا
وتشاور وتنادي علينا
وشواطئ مفتوحة تملأ
وبتحضن دايما خطاويننا
والفن ليلاتي يسمعنا
والمغنى ليلاتي يغزينا
مهرجانات دوليه بتفتح
في قلوبنا سكة أمانينا
الله ع الحريه يا بلدي
الله على إسمك يا امينه
وولادي وولاد أولادي
هيعيشو فاكرين أمجادك
وعشانك هتهون أرواحهم
بنجاحهم هيتم نجاحك
ونجاحك هيداوي جراحهم
وحياتهم هتعيش تفديكي
هاتي ايديكي ف حضن ايدينا
ندقي وتدقي ونعلا وتعلي
لحد الشمس ما تفتح ليينا

مغروره

ماشى الزمان ماشى
والارض ليه نايمه
نحسب ساعات وايام
والدنيا مش دايمه
عماله تتمحك
وف مكرها عايمه
مغروره مش فاكره
إن الحياه ذاتنا
بكره اللي فاتنا خلاص
هينسى قصتنا
نلبس حرير أو خيش
العمر هيعدى
والدنيا بتودى

لما النصيب يجي
والقسمه مقسومه
والبخت على ايدى
والارض متمدده
على اللي راحو زمان
وأديننا بالحرمان
ماشيين على قلبها
وتمللى ليه ظالمه
بكره يموت فى العين
بعده ما بين وما بين
والخيريعين القلوب
ما هو كلنا أيوب
وشربنا من بحرها
مأموره من ربها
تعصرنا فى بطنها
والدود بيرعانا
ما فيش زمان ومكان
ولا فرح ولا أحزان
إلا بحكم الله

أرحمنا يا رَحْمَن
من كل شوم وهوان
أرحمنا يا رَحْمَن
من الدنيا والايام
لآخر المشوار
وطريق مرار في مرار
واحفظ نبينا الزين
من قسوة الطغيان
وعذاب ما لهش حدود
إملئ الوجود أنوار
خلى الحياه بستان
والجنه لنا مسار
دا اللى يطيع ربه
الفرح يسعى له
ويعيش حيا ته أمان
ماشى الزمان

البطالة

مشيت ياما
ويا ما فى السنين لفيت
ما عشقت غير بلدى
وتعبت لما إحنيت
وقاسيت أنا وقلبى
م الدنيا والاحوال
والفوضى والاتلال
خلو العذاب إكتمل
زرعت شجرة أمل
بوردها تبنى
تعلّى جسور العلم
والحلم يتفسر
تكسر ضلوع جهلنا
وتشدّ حبل ضعفنا
الى مالو هش حدود

عائشين زمان الكسل
ماسكين في ديل الغل
ويوماتي مش فايقين
راكبين ملاهي الحياه
في الغرز والقهوه
والكازينو والملهي
والعيشه

ماشيه بسؤالها
والنيه بطاله
هلت علينا البطاله
لابسه فساتينها
تسرى ما بين اجيال
وتهد في عقولهم
ويوماتي مفعولهم
ضايع مع الاوهام
عميت مزارعنا
ما عدتش شايفانا
حتى مصانعنا
مش عايزه شغاله

ويا طول رحلتنا
على مهر كربتنا
والخلق محتاجه
لاى شئ يغنى
الفقر جامعنا
والعمله كرهتنا
وصفاتنا أصبح غيوم
نزل الجنين محروم
طلع الشباب فى الهباب
كثرت ما بينا العوانس
والقطر فأيتهم
صبحت مزلتهم
بالغلب مكسبه
والقلب حاسسها
وتملى إحساسها
واخذ نفسها لورا
ويا هل ترا يا زمان
هتم خطوبتها
وابن الحلال فى الحقيقه

يفرح لفرحتها
طول ما البطاله ورانا
والفلس سلطان
عمر العيدان ما تشب
ولا تطرح الاغصان
والجيبه مقلوبه
ولا مره عبيتها
والجته بتروح
بتوه فى فرشتها
والنفس من موتها
عايمه ورا التيار
والبحر فايتها
والنبت زرع الامل
عايش فى دوامه
والياس شمسيه
مفروده فوق الشباب
بالشهوه مسقيه
والخيه متحكمه
والمحكمه ظالمه

صبح الطريق ضلّمه
وما فيش ولا كلمه
فى الجد متسيده
والحسره متسده
وبتحرق الزرعه
والأسمده من نار
والارض من جوعها
الشق مزعها
والميه برجوعها
تحيتها من تانى
تملا الصوانى طعام
البطن تفتح قوام
وتقوم تقابلها
والاب يجنى العمل
والام ترمى الملل
وتسوى ذوادنا
نرجع لامجادنا
وبلادنا تبقي نعيم
نصحى على حبها

نعشق سمار نيلها
يملا النهار وشها
نغنى ونسكن فيه
ما هو اصل نيلها كريم
بيجود ويبدى
ونقول كمان عايزين
بساتين ومصانع
فدادين نوسعها
والصحرا نزرعها
والخير يملأها
ورمالها تطرح ذهب
دا اللى وهب ربي
شبي يا قوه إيماننا
وإدى زمانا دروس
من بدرى إحنا الفراعنه
على الصعاب بندوس
طب ليه نبوس القدم
وتمللى نبدى الندم
وإحنا الهرم والمجد

ياريت نقوم نبني
وكفايه ردم وهد
بالمجد ممكن نعدى
بالصبح نبقي تاريخ
ميهناش المدافع
ولا نخشى يوم صواريخ
وقت المحن والتحدى
بنعدى مهما يكون
ماتبلا بينا نقف
وقفه تنجيننا
واللى بيعتب علينا
مش هيلاقى له مكان

يا إسماعيليه

يا إسماعيليه زيك مين
فيكى الخضره والبساتين
عاليه وغاليه ودايما رايه
محروسه يا ست الغاليين
فى الشده إبنك ما يلين
وحياته على كفه تهون
والارض بتتبت أحرار
ليل ونهار واقفين للمعون
فيهم روح الاستقرار
كسرو اليأس وهزمو العار
وتاريخهم على البنيان
يا إسماعيليه جمالك بان
ضواحيكى أجمل الحان
نبض الامه شعار وفخار
ضحو وقالو نموت وتعيشى

وتعيشى يابلدنا تعيشى
وما فيش غادر ولا مغرور
نادى علينا نلف ندور
يا سفينه ويقلب كبير
وخدانا فى كل المشاوير
وف حضنك عايشين ملايين
فاتحين بابك للزوار
وبنملاكى خضار وعمار
من زارك يرجع فرحان
من خيرك يصبح سلطان
يشهد لك إنك مثاليه
يا مدينتى يا بلد الاحرار
دا قنالك بينادى علينا
وبيسأل فين القبطان
والبحر بيعزف أنغام
وسياحه مش عايزه كلام
والميه بترقص فى بحورك
والحب مخضر الوان
يا إسماعيليه زيك مين
وطنيه والقلب كبير

هلال رمضان

راحت و جت ايام
خضّر هلال رمضان
ضحكت عيون السما
ورقصت الاغصان
والارض حنت لطيفك
وغنت الازهار
والطير يسبح لربه
وملائكة الرحمن
عشق الحبيب النبي
ضوى في كل مكان
يا فرحة الصائمين
ع التقوى متعاهدين
وما فيش زميم ونميم
يقدر على الاحسان

ليه ع العداوه نعيش
والحب بينا ما فيش
والحقد راكب وسايق
والكره ميت رهوان
ليه للفلوس جامعين
بمذلة المساكين
ليه بالغرور طالعين
ندهس فى كل يتيم
دبلت زهور الحب
الروح بتتألم
والطير ما بين الشجر
ينشد ويتظلم
والريح يجيب المطر
والفقر بيغيم
لما الظلام ينتهى
والغش ما نشفهوش
النور هيملى الحياه
والصوم هيبقى النجاه
ها نقوم نصلى الفجر

والورد والتسايح
وف آخر التراويح
هنقابل الفرحة
واليوم يجيب اليوم
والصوم ذكاة النفس
يا نفسى توبى خلاص
نور هلال رمضان

صحوة الضمير

أحكم بقى يا زمان
ما تقولش مش فاضى
طلع الضمير نعلان
والغلب مش راضى
ليه الضمير إنحنى
والعدل مش فاضى
حال الضعيف تعبان
ف الصحرا والوادي
بالحب نزرع أمل
ويوماتى بينادى
نفسه الفرحة يكتمل
ويدوم هنا بلادى

فى الكوشه زى القمر
وحبايبه بتهادى
نفسه الحياه تعشقه
وتدوّقه الافراح
من بعد يوم العمل
يلقى ساعاته براح
ترجع حياة الامل
يلقى الوداد سواح
قام الضمير م النوم
والعقل بقى هادى
رجّع خريف الزمان
شاف الضعيف بادى
بالصبر كسر الغلب
وغيره كان بادى
أصل المحبه تخضر
الصحرا والوادى

يادنيا

يادنيا يا فانيه
ليه ساكته ع الظالمين
سايبه الضعيف مجروح
ماشي بدمع العين
سايبه السلام مدبوح
والقدس قلبه حزين
جرحك يا دنيا كبير
ليه ديناً يبقى أسير
يا ليلة الاسراء
هاتي بشاير الخير

نرجع سوا صامدين
نحمى الوطن والدين
نضرب بشده وعزم
نبقى صلاح الدين
يا دنيا قولى ليه
الشر باشا وبيه
والخير يادوب ببيص
ولا حد حاسس بيه
يا دنيا حوشى الغدر
كترت وشوش الكفر
وبقينا تحت الصفر
والصفر شال الطين
بنموت فى كل مكان
وشهيد يروح لشهيد
والخوف فى كل آوان
والنار يوماتى تقيد
يا أمة التوحيد
الجنه للموعد
والحق مهما يغيب

لابد يوم ويعود
الفجر جأى بنهار
شأيل رصاص وبارود
والكافر المحتل
للنار هيبقى وقود
فى الدنيا والآخرة

مذاد

يا سيدى يا رايق
يا عم يا فنان
القلب مش طايق
هتبيع الحب بكام
بالف ولا اتنين
داوى الاتنين يا غزال
إسقينى كاس الحب
داوى جروح القلب
إسقينى كاس الشهد

ولا إحننا مش ع البال
يا بياع الجمال
والرقه والدلال
شغلت الروح وعيني
شايفاك آخر جمال
أنا قلبي لا بينباع
ولا حتى بالملايين
باين عليك لوّاع
بتغير العناوين
علمنى الحب علم
خلينى أرجع وأسلم
وأصبح فى بحور هواك
حيرنى يا سيدى حير
سيبنى أسرح وأدور
عن جنات النعيم
عن حب يكون رحيم
يمسح م الروح أهاتى
ويوماتى يقول تعالى
ويتم الود منى

دا هوای فی قلبی طالع
یزرع حبك مزارع
ویقولی یا محبوب
دق القلوب غلاب
أنا عمری ما شوفت حب
فی غرامه القلب داب
إیاك تنسانی تانی
وتحیر بالی تانی
وتضیع لی الامانی
والقاک جانی علیه
همسك من قلبی سامعه
إحسای وسابقنی لیک
دلنی ع الحب یاللی
طول عمری بأحن لیک

القمر بيقول

قمر السما بيقول
مين فى جمالى يكون
ع الارض ببدر ضى
وبنورى بأملى الكون
الليل بيستنانى
وطريقه بى يهون
بصيت فى وسع الارض
شوفت العجب فى الكون
فى مصر أم العجايب
هرم باتيه فرعون
يامسعد الزوار
من كل جنس ولون
عشقو الآثار والكرم

وتاريخ جذور وغصون
عشقو جميع الصفات
وعيون بتروى عيون
عدت سنين وسنين
وأنا بالغرام مفتون
عمّال الفأ وأدور
عاشق سمار اللون
أسكن في قلب الفضا
وأكوى الخسيس والدون
وأمسك سلاحى وأدافع
وأغلب ولاد صهيون
وأرصد بحور الكواكب
ومشاكل الاوزون
وأسأل ف بطن الارض
عن كل شئ مدفون
وأسأل في قلب الحجاره
ليه الجفا مخزون
والعتمه جوه الخلق
خنجر وسيف مسنون

ليه يا قمر تفكر
إن الضعيف مجنون
ما تبص على قدسنا
تلقى الهرم حواليه
أحبابه هزمو الجرب
اللى معشش فيه
نقشوا بدم الشهيد
وضحو بالمليون
صلينا فيه فرضنا
أقباط ومسلمين
هتعيش هنا ف قلبنا
لو دمنّا هيهون

همس العيون

إبعدى عنى عينيكي
أرحمى قلبى وهوائى
نفسى مره التقيكى
جايبه أشواقك وجايه
كل أملى ألتقيكى
بسمه رايحه وضحكه جايه
جوه قلبى الحب شايفك
عمرى كله مذك ليكى
حتى دق القلب عارفك
كل يوم يسأل عليكى
نظره منك تحتوينى
علمينى إزاي أد وب
لو بكلمه تريحينى
حبى يسرح فى الدروب

قوة الحب اللى فى
إسألنى عنها هواكى
لو غرامك حس بى
هأبدر الفرح فى سماكى
والصبا توبك وشالك
والرموش بتقول وتحكى
والصفا حاضن جمالك
والخدود للورد تشكى
شاورى لى وإنداهيلى
هتلاقينى جريت عليكى
والجنان يصيح دللى
والحنين أمله يداويكى
وإن رضيتى بالموده
قربى مدى إيديكى
كونى دايما مستعده
وافتحى لى بحور عينيكى
أصل أنا
فى عينيكى دايب
م البدايه للنهايه

تعريف الشاعر

شعبان ابراهيم عبد الله محمد التونى

مواليد ٢٥/١٠/١٩٥٨

كسفریت : الاسماعيليه

عضو رابطه الزجالين وكتاب الاغانى

نشرت له بعض الاعمال فى الصحف والمجلات

اذيعت له بعض الاعمال باذاعة وتليفزيون القناه

هذا هو الاصدار الاول للشاعر

الفهرس

٧	شجرة أمل
١٣	صباد
١٩	عضة الثعبان
٢٣	ليه ياقلبي
٢٥	شرقت يا رمضان
٢٧	إخوات
٣١	جنه الحب
٣٤	أغلى حب
٣٦	بحر الشوق
٣٩	سهر الليالي
٤٢	إحنا ولادك
٤٨	مغوره
٥٢	البطاله
٥٩	يا إسماعيليه
٦١	هلال رمضان
٦٤	صحوة ضمير
٦٦	يا دنيا
٦٩	مذاد
٧٢	القمر بيقول
٧٥	همس العيون

للتواصل مع الشاعر

٠٦٤٣٦٠٠٣٩٣
٩٣٩

رقم الإيداع بدار الكتب

٢٠٠٧ / ٤٧٩٧

الترقيم الدولي

٩٧٧-٣٧٤ - ٢٧٨ - ٤

دار الإسلام للطباعة والنشر

٠٥٠٢٢٦٦٢٢٠ - ٠١٢٢٦١٤٣٦٣